

cedenter, quando Angelus ei nunciabat Messiam, de se proxime nasciturum, non importat difficultatem voti, sed potius modi, quo componi debebant Virginitas, & Maternitas. VII. Frustra obijciuntur exempla Virginitatis olim servatæ sub veteri lege; dato enim, quod aliqui eam servaverint, non servarunt tamen voti religione, sed studio tantum temperantiæ. Et probatur: Si quæ proponuntur, quæ Virginitatem ante Christi adventum servaverint, sunt potissimum filia Jephthæ apud Judæos, & Virgines Vestales apud Gentiles; & hæc exempla nil probant: ergo &c. Probatur minor. Filia Jephthæ vel ob votum patris, & non ex suo libero consilio, adeoque coacta Virginitatem servavit, vel finxit, eam servare se velle, ne patris gladio occideretur. Vestales vero Virginitatem servabant tantum ad tempus, at non vovebant; quia expleto tempore, quo ministerio illi se mancipabant, nubebant. Neque Eliæ exemplum aliquid pro re præsentis facit. Testimonium enim, quod producit Joannis Hierosolymitani lib. de instit. Monachi scribentis: *Mariam adhuc infantulam Virginitatem perpetuam ad exemplum Eliæ amplexam esse*. Liber enim ille non est illius Joannis Hierosolymitani Patriarchæ, qui vivebat temporibus Hieronymi, & Epiphani, sed recentis Monachi Carmelitæ; ut post censuram Cardinalis Bellarmini lib. de scriptoribus Ecclesiasticis in Joanne Hierosolymitano, & Cardinalis Baronii ad annum 444. discurret Serry. VIII. Genesis 1. Protoparentibus nostris benedixit Deus, & ait illis: *Crescite, & multiplicamini, & replete terram*; & Genesis 9. *Benedixitque Deus Noe, & filiis ejus, & dixit ad eos: Crescite, & multiplicamini, & replete terram*; quibus verbis satis ostenditur præceptum prolis procreandæ, & populi judaici multiplicandi. IX. Exodi 23. legitur: *Non erit infœcunda, & sterilis in terra tua*: ergo neque Virgo; par enim est ratio. X. Sterilitas mulieribus veteris Testamenti erat probro, ac dedecori, & maledictionis instar habebatur: ergo ob rationis paritatem etiam Virginitas. Probatur antecedens. Osee 9. *Da eis vulvam sine filiis, & ubera alentia*. Genesis 30. Rachel quando peperit filium dixit: *Abstulit Deus opprobrium meum*; & 1. Reg. 1. Anna uxor Helcanæ vehementer angebatur, quod Dominus conclusisset vulvam ejus. Ex opposito autem fœcunditas habebatur pro felicitate, & benedictione; Isaiæ 26.

*Beatus, qui habet semen in Sion, & propinquos in Jerusalem* & Lucæ 1. quod Joannem in lucem ediderit, Elisabethæ congratulabantur amici, & cognati, quia magnificavit Dominus misericordiam suam cum illa. XI. Augustinus lib. de bono viduitatis cap. 7. *Santas feminas prophetis temporibus nubere obedientia, non concupiscentia, compellebat, ut propagaretur Populus Dei*: ergo erat nubendi præceptum. Cui concinit Bernardus serm. de Virgine ad Apocalypsis verba, *Signum magna apparuit in celo*, clare dicens, Virginem Deiparam, quando Deo virginitatem dicavit legis Mosaica decreta transcendisse: ergo virginitas legis Mosaica decretis repugnabat. XII. Votum debet esse de meliori bono; sed temporibus B. Virginis propositum Virginitatis secundum legem veterem non erat de meliori bono: ergo non poterat eam vovere Virgo Deipara. Probatur minor. Tempore illo meliores erant nuptiæ, quam continentia, quod etiam docet D. Thomas: ergo Virginitatis propositum, seu votum non erat de meliori bono. XIII. Poterat B. Virgo formidare, ne ob Virginitatem suam impediretur Messia adventus; si scilicet ex ipsa generanda esset Messia Mater; sed hæc formido impediēbat, ne ipsa Virginitatem voveret. XIV. Si B. Virgo habuit voluntatem contrahendi matrimonium, habuit etiam voluntatem tradendi alteri sui corporis dominium: ergo habuit quoque animum reddendi debitum conjugii petenti; Sed hoc est impossibile cum virginitatis voto: ergo &c. XV. Potuit B. Virgo intelligere Angeli verba, quod illo eodem momento fuisset conceptura Verbum: ergo absque eo quod mentem haberet ad votum, de illo potuit interrogare, quomodo fiet istud. XVI. Angelicus Doctor aperte docet in 4. dist. 3. qu. 2. art. 1. & 3. par. qu. 28. art. 4. Beatam Virginem vovisse sub conditione, si ita Deo placeret, vel nisi Deus aliter ordinaret; & deinde cognita Dei voluntate, absolute vovisse.

Respondemus ad I. quod qui sic discurrunt, asserunt quoque Virginem Deiparam post contractum cum Joseph matrimonium, ac pariter de ejusdem Joseph assensu vovisse. At quoniam rationes, & auctoritates a nobis allatae plane convincant votum fuisse emissum ante desponsationem, & ante angelicam salutationem, horum Auctorum opinioni non est amplius locus; adeoque de illa nulla habenda est ratio.

Ad II.